

Boleh tuai hasil seawal lapan bulan

Oleh **AZMAN IBRAHIM**

pengarang@utusan.com.my

■ **KUALA LUMPUR 13 MEI**

TANAMAN hiliran seperti durian Musang King, halia Bentong dan pokok vanila mampu memberi pulangan kepada peneroka Felda seawal lapan bulan atau dalam tempoh tiga tahun akan datang.

Dekan Fakulti Pertanian, Universiti Putra Malaysia (UPM), Prof. Dr. Abdul Shukor Juraimi berkata, halia Bentong boleh dituai dalam tempoh lapan hingga 10 bulan selepas ditanam, manakala vanila berbunga selepas tempoh dua tahun selain mempunyai harga yang tinggi iaitu RM1,000 hingga RM1,800 sekilogram.

Menurut beliau, durian Musang King pula akan membuah hasil dalam tempoh tiga hingga lima tahun akan datang.

“Vanila, penanaman dan pemrosesannya agak rumit. Ia perlu didebungakan secara manual dan memproses buah juga agak rumit. Halia Bentong pula lebih mudah diurus kecuali ada sedikit masalah serangan penyakit.

“Pada pendapat saya, ia merupakan inisiatif yang baik kerana tujuannya adalah untuk pendapatan sampingan atau tambahan kepada peneroka. Maknanya, peneroka masih mengusahakan tanaman asal iaitu sawit dan tiga tanaman tersebut sebagai tambahan atau sampingan,” katanya kepada *Utusan Malaysia* ketika dihubungi hari ini.

Beliau mengulas kenyataan Pengerusi Lembaga Pertubuhan Peladang, Datuk Mazlan Aliman bahawa tiga produk pertanian iai-



ABDUL SHUKOR JURAIMI

tu durian Musang King, halia Bentong dan vanila akan di tanam di Felda Lurah Bilut, Pahang yang merupakan tanah rancangan pertama negara.

Katanya, pada peringkat permulaan, durian Musang King akan ditanam di kesemua kawasan rumah peneroka manakala

halia Bentong dan vanila ditanam secara berkelompok.

Penanaman vanila pula akan diusahakan secara berkelompok oleh Peladangnya Felda Lurah Bilut dan penanaman halia dimulakan di kawasan seluas 0.4 hektar oleh Peladang Muda Felda Lurah Bilut.

“Tetapi, saya agak skeptikal untuk ketiga-tiga tanaman ini boleh menggantikan kelapa sawit sebagai komoditi utama negara,” ujarinya.